



江 沛

民國十五年生

陸軍官校畢

現職／軍職退伍

曾獲／大陸李杜林詩詞大賽佳作獎

盆蘭

性本愛自然，生長在幽谷，只緣被香誤，移植入華屋。
既無清露滋，更乏朝陽沐，縱有碧玉盆，於我如牢獄。
不求美人譽，敢期名士目，但望返林壑，怡然遠塵俗。

玉山雪霽

玉山矗立眾山中，峻絕參天氣勢雄，年年雪壓冰封早，
我欲攀躋無路通。今朝旭日穿雲出，似為春回傳信息，
殘雪漸消山漸青，峰巒可復舊顏色。心香一瓣禱天翁，
霽色深期大地同，歸馬放牛兵燹淨，吾民可免化沙蟲。

春夜

夜靜中庭立，頻看花影移。不眠非愛月，排悶欲尋詩。
搜盡枯魚腹，難成幼婦辭。家妻常笑我，陋巷一書癡。

防颱

難忘颱災烈，防治豈可疏。早為修戶牖，即起浚河渠。
處處籌邊似，人人拒敵如，任他風雨惡，可免伴龍魚。

春日即事

門外群巒聳翠鬢，春光已伴鳥聲還。井桃霞染紅千點，

堤柳波涵碧一灣。欲遣鄉愁頻中酒，為尋詩思飽看山。
幽居莫笑高軒少，贏得餘生盡日閒。

清明遇雨

漫天煙雨送蒼涼，處處播間祭掃忙。春塞有花皆濺淚，
清明無客不思鄉。左徒墳上餘芳草，帝子祠前賸夕陽。
莫道歸途雲正鎖，夢魂昨夜到瀟湘。

至日書懷

黃鐘初報動飛灰，漸覺和風拂面來。日暖南枝應綻蕊，
陽回北地合聞雷。敢期凍雪春能解，不信愁襟酒可開。
小隱牆東誰是伴，幾竿修竹倚籬栽。

遠望寒山

遠望遙岑不可攀，白雲渺渺擁煙鬟。霜凋老樹千林瘦，
霞染疏楓幾處殷。夕照影翻鴉競宿，夜空風勁月銜山。
料知梅已衝寒放，行見春光次第還。

竹風

庭前栽竹漸成林，枝葉扶蘇灑碎陰。時引清風來枕簟，
炎荒何畏暑相侵。